

**Johor, Perak naik bendera separuh tiang tanda penghormatan MH370**  
**Astro Awani**  
**26 Mac 2014**

**KUALA LUMPUR:** Johor dan Perak mengorak langkah untuk mengibarkan bendera negeri masing-masing separuh tiang bagi menghormati semua penumpang dan anak kapal pesawat MH370.

Johor menjadi negeri pertama berbuat demikian berikutan titah Sultan Johor, Sultan Ibrahim Sultan Iskandar yang mahukan semua bangunan kerajaan negeri mengibarkan bendera negeri separuh tiang.

Menteri Besar Johor Datuk Seri Mohamed Khalid Nordin berkata, kibaran bendera separuh tiang hanya dilakukan pada Selasa sahaja.

Perkara sama turut dilakukan di Perak.

Pemangku Raja Perak, Raja Doktor Nazrin Shah menitahkan semua jabatan, agensi, institusi, sekolah termasuk pihak swasta untuk mengibarkan bendera perak separuh tiang pada Rabu.

Titah tersebut disampaikan menerusi pekeliling kerajaan negeri.

DYMM Pemangku Raja Perak, Raja Doktor Nazrin Shah menitahkan kepada semua jabatan, agensi, institusi, sekolah termasuk pihak swasta untuk menaikkan bendera perak separuh tiang pada Rabu, 26 Mac 2014 sebagai tanda simpati dan dukacita negeri dan rakyat Perak kepada kaum keluarga penumpang dan anak kapal pesawat MH370.

Dalam pada itu, baginda turut menzahirkan rasa dukacita dan simpati kepada keluarga penumpang dan anak kapal pesawat MH370 susulan daripada laporan terkini kepada tragedi tersebut.

Titah tersebut disampaikan menerusi pekeliling kerajaan negeri oleh Timbalan Setiausaha Kerajaan (Pengurusan) Negeri Perak, Datuk Razali Othman kepada semua jabatan-jabatan negeri dan persekutuan, badan-badan berkanun serta semua ketua jabatan pihak berkuasa tempatan.

Copyright © Astro Awani Network Sdn. Bhd. 2014 (535275-D). All Rights Reserved.

Source: <http://www.astroawani.com/news/show/johor-perak-naik-bendera-separuh-tiang-tanda-penghormatan-mh370-32551?cp>